

Eros Cisilino,
President de ARLeF
Agjenzie regionâl pe
lenghe furlane

Iscrizions viertis fin
ai 14 di Fevrâr.

La ARLeF e
compagne lis fameis
in cheste sielte.



Sielzi il furlan a scuele: une oportunitât pal avignî

Cu la iscrizion a scuele (fin ai 14 di Fevrâr), lis fameis a an di decidi ancje se aderî al insegnament dal furlan pai lôr fis. Une sielte di fâ tal moment de iscrizion in linie, sul portâl dal Ministeri de Istruzion e dal Merit - unica.istruzione.gov.it - tal câs de primarie e de secondarie di prin grât, o midiant dal modul di cjarte, tal câs de scuele de infanzie. Cui che al vûl aderî a chest percors, al à un jutori in plui cun Anin!, il manuâl che al compagne i arlêfs, in particolâr chei de scuele primarie, a scuvierzi la lenghe e la letature furlane; al è promovût de ARLeF - Agjenzie regionâl pe lenghe furlane e de Regjon Autonome Friûl-Vignesie Julie tal meti in vore il Plan gjenerâl di politiche linguistiche pe lenghe furlane.

Cul president de ARLeF, Eros Cisilino, o sin lâts insot cul argument par sclari lis ideis di cui che ancjemò nol à decidût se aderî ae didattiche plurilengâl.

Ce i rispuindial a cui che al à pôre che studiâ il furlan al "gjavi timp" a chês altris materiis?

L'insegnament dal furlan nol gjave e nol à mai gjavât timp a chês altris materiis: la normative in vore e stabilis ancje criteris di autonomie che ogni scuele e pues doprâ par modelâ o par definî i programs. Pal insegnament dal furlan vuê a son previodudis almancul 30 oris, par dut l'an scolastic.

Parcè vuê ise une oportunitât sielzi il furlan a scuele?

E je simpri stade une oportunitât, ma vuê ancjemò di plui parcè che al è clâr che la popolazion e à voie di afermâ la sò identitât teritoriâl. La adesion (simpri alte, tal 2025 e jere dal 78%) e met in lûs che e je une grande cussience di chei che a son i vantaçs cognitifs, sociâi e culturâi de educazion plurilengâl e che la ricercje scientifiche ju dimostre a clâr.

Ce i vuelial dî a cui che nol fevele par furlan ma al cres i fis in Friûl?

Fevelâ al domande un piçul sfuarç in plui rispjet ae comprension: nol è ce preocupâsi, bisugne dome esercitâ la articolazion fonetiche. Spes, il fat di no fevelâ al è peât ae pôre di falâ,

ma ducj o fasin erôrs e perfezionâsi al è un lavôr costant, ancje par cui che al crôt di cognossi ben un codiç comunicatif. Al va evidenziât che plui de metât de popolazion regionâl e declare di capî il furlan, ancje se no lu fevele: chest al pant une grande vicinace al teritori, element significatif par che si dopri la lenghe in ducj i ambits de vite di ogni di, di chei plui informai a chei plui ufiçiai.

Se al pense al avignî, ce rûl si immaginial pe lenghe furlane te scuele?

Che e vignedi doprade tes materiis curicolârs, come chês sientifichis, par esempi. Il fat di inçressi lis 30 oris par an nol è dome une sperance, e je une volontât che e rive di plui bandis. La lenghe e influis ancje sul mût di pensâ e su la capacitât di azion, duncje o crôt che l'insegnament dal furlan a scuele al rapresenti une oportunitât fundamentâl pai zovins che a fasin part des nestris comunitâts e che in curt a diventaran i vèrs protagoniscj de amministrazion dal nestri splendit Friûl.